

YESUS

ALIDOP

KOMBALI

Orang yang tulis: Penny Frank

Yesus Hidup Kembali

Orang yang tulis: Penny Frank
Orang yang gambar: John Haysom



Kata-kata Pertama

Alkitab bilang par katong bagemana Allah su utus Antua pung Ana Yesus par kasi tau katong soal Antua deng bagemana katong bisa jadi Antua pung anana.

Carita ni bicara soal apa yang jadi abis orang Yahudi pung pamimping-pamimping agama di kota Yerusalem suru orang bunu Yesus.

Ade-ade dong bisa baca carita ni dalang ade-ade dong pung Alkitab. Akang ada dalang ampa kitab Injil pung bagiang laste. Ampa kitab tu, **Matius, Markus, Lukas, deng Yohanis.** Injil tu pung arti "**Kabar Bae.**"

Judul Asli: "The First Easter"

No. 48 in the Lion Story Bible series

Penny Frank

©1986 Lion Publishing plc, Oxford England


Ilustrasi © 1986 John Haysom

Yesus Hidop Kombali

Diadaptasi oleh Tim Melayu Ambon


Diterbitkan oleh © Sinode Gereja Protestan Maluku 2016

ISBN: 978-602-74269-0-0




Abis tantara-tantara salib Yesus, Antua pung tamang-tamang dekat yang nama Yusup deng Nikodemus, dong bungkus Antua pung badang deng kaeng puti panjang yang biasa orang pake par bungkus mayat. La dong taru Antua dalang goa satu di dalang taman. Abis itu, dong guling batu basar satu par tutu mulu goa tu. Tantara-tantara badiri jaga di muka goa tu jang sampe kaco.

Yesus pung murid-murid deng babarapa orang yang sayang Antua bale kombali ka tanpa yang dolo dong parna pake par makang malang laste sama-sama deng Antua. Dong pung hati paleng susa deng takotang paskali.



Parampuang-parampuang tu bajalang maso tado-tado ka dalang taman tu. Dong bajalang deng pikirang satu kapala, bagemana dong bisa maso ka dalang goa. Mar waktu dong su mau sampe bagini, dong skrek paskali. Batu sabuku memer yang tutu mulu goa tu su taguling la tantara-tantara yang badiri jaga goa tu su seng ada lai.

Mar waktu hari Minggu amper siang lai, parampuang-parampuang pi bawa minya deng rampa-rampa yang bobou sadap par ambor akang di Yesus pung mayat. Dong biking bagitu iko orang Yahudi pung adat waktu bakubur orang mati. Dong tau kalo ada orang yang su pi taru Yesus pung mayat dalang goa mar dong seng ada pung waktu yang cukup par ator samua bae-bae.




Waktu dong pung hati ada balisa, skrek bagini dong dapa lia laki-laki dua orang ada badiri di pinggir goa. Laki-laki dua yang badiri tu pung pakiang manyala mangkilat. (Dong dua laki-laki tu malekat.) Parampuang-parampuang tu amper-amper seng parcaya apa yang dong lia.

Malekat-malekat tu tanya dong kata, "Mama-mama e, mangapa kong cari Yesus di sini? Antua su hidop kombali! Mama-mama seng inga apa yang Antua parna bilang dolo tu lai ka? Dolo Antua bilang kata nanti Antua dapa bunu mar abis itu Antua hidop kombali. Capat bilang akang par Antua pung murid-murid."

Dong lari par mangente ka dalang goa. Mar seng ada apapa di sana! Apa yang su jadi ni? Dong pung dada tapukul. Dong pung hati mulai balisa.

La parampuang-parampuang tu lari pulang capat-capat, langgar jalang-jalang di kota tu.

Waktu ada lari tahosa-hosa bagini, dong laeng bilang par laeng kata, "E, Yesus su hidop! Allah pung malekat-malekat su bicara deng katong tadi."



Pas parampuang-parampuang tu sampe di tanpa Yesus pung murid-murid yang laeng ada tinggal, dong toki pintu kuat-kuat.


Dong bataria panggél Yesus pung murid-murid kata, "Hoe, buka pintu! Ada barita yang paleng bagus ni. Yesus su hidop!"

Hari itu jua, Yesus pung murid dua orang ada bajalang pulang ka kampong Emaus. Dong seng parcaya kalo Yesus su hidop.

Dong bilang, "Yesus su mati. Jadi, mangapa kong katong masi tinggal tarus di Yerusalem lai? Mari katong pulang!"

Pas dong dua ada bajalang bagini, laki-laki satu bajalang sama-sama deng dong lai. Laki-laki tu kaya seng tau apa yang su jadi. Tagal itu, dong dua carita par dia soal bagemana Yesus mati. Mar yang biking dong dua seng abis pikir tu, dia mulai carita dari muka sampe balakang par dong dua mangapa sampe Yesus musti mati.

Waktu dong dua sampe di ruma, dong buang suara par dia kata, "Bu e, mari maso makang sama-sama deng katong jua."



Waktu dong ada di meja makang bagini, laki-laki tu ambe roti la sombayang minta dangke dari Tuhan. Tarus, dia mulai bage-bage akang. Pas dong dua lia bagitu, dong dua dapa tau kalo laki-laki tu sapa. Antua tu Yesus sandiri yang dari tadi sama-sama deng dong dua.

Mar, waktu dong dapa tau kata Antua tu sapa, skrek bagini Antua ilang.

Tarus, dong laeng bilang par laeng kata, "Katong musti lakas-lakas bale ka Yerusalem la kasi tau tamang-tamang laeng lai."

Biar kata su malang, dong dua paparipi bale ka Yerusalem.



Waktu dong dua sampe, dong carita par Yesus pung murid-murid yang laeng soal samua yang jadi waktu dong di tenga jalang. Dong carita kalo dong baru dapa kanal kata itu Yesus waktu Antua bage-bage roti tu.

Waktu Yesus pung murid-murid ada bacarita, skrek bagini Antua datang di tenga-tenga dong. Dong samua tacigi la mundur.

Yesus bilang, "Jang taku! Beta ni bukung spok. Ada makanang ka seng? Beta mau makang."

La murid-murid lia Antua makang. Memang, dong paleng sanang bisa lia Antua lai.



Mar waktu itu, Antua pung murid satu lai yang nama Tomas seng ada di situ, jadi dia seng dapa lia Antua.

Waktu Yesus pung murid-murid carita par dia kalo Yesus su hidop, dia bilang par dong kata, "E! Jang harap kata beta mau percaya akang. Sampe beta lia deng beta pung mata kapala sandiri la sonto Antua pung bakas tanpa paku tu sandiri baru beta percaya."

Akang pung hari Minggu muka bagini, dong samua bakumpul sama-sama. Tomas jua ada deng dong. Yesus datang lai.

Yesus bilang par dia kata, "Tomas! Ini Beta ni! Mari sonto Beta pung bakas luka ni. Sakarang, ale mau percaya kalo Beta ni batul-batul hidop ka seng?"

Tomas bilang, "Sio Bapa e! Beta batul-batul percaya. Bapa ni beta pung Tuhan deng beta pung Raja."





Abis kajadiang tu, Yesus pung murid-murid pulang ka satu-satu pung ruma di pinggir dano Galilea. Satu kali bagini, par pagi-pagi hari, dong pi cari ikang deng dong pung parau. Dari malang sampe pagi dong su mancari mar dong seng dapa apapa. Dong pung jareng tinggal kong kosong. Skrek bagini, laki-laki satu bataria dari pinggir dano tu kata, "Hoe! Buang jareng tu ka parau pung sabala kanang."

Mar, dong laeng bilang par laeng kata, "Ayo. Dia kira katong seng tau buang jareng kapa?"

Mar, dong tetap biking iko apa yang dia su bilang tu. Seng lama bagini, dong hela ikang paleng banya sampe dong pung jareng tu pono tare-tare sama mau tarabe sa.

La satu dari dong bataria, "He! Itu Yesus tu!"

Pagi tu, abis dong samua minong te pagi sama-sama, Yesus bicara sandiri-sandiri deng Petrus. Antua bilang par dia kalo Antua kasi ampong dia pung sala. Barang, waktu Antua dapa tangkap pagi-pagi hari tu, dia bilang dia seng kanal Antua. Antua jua kasi tugas penting par dia.


Anam minggu abis kajadiang di pinggir dano tu, Yesus bawa Antua pung murid-murid par nai gunung satu yang ada di luar Yerusalem.

Yesus bilang, "Kamong samua su lia bagemana Allah kasi Antua pung kuasa par Beta. Deng kuasa tu, Beta kasi bae orang saki deng kasi hidop orang yang su mati. Kamong jua su dengar samua-samua soal bagemana kamong bisa jadi Antua pung anana.



Sakarang ni su waktu par Beta bale kombali par Beta pung Bapa. Mar, Beta mau kamong carita par samua orang soal Beta. Pi ka Yerusalem la tunggu di sana, tagal Allah nanti kasi kuasa par kamong. Kuasa yang Antua mau kasi tu, kuasa yang sama deng kuasa yang Antua su kasi par Beta."

La awang turung tutu bungkus Yesus la waktu awang tu ilang, Antua seng ada lai.



Yesus pung murid-murid tu bale ka Yerusalem la dong tunggu di sana. Dong sombayang par Allah sama deng yang Yesus su ajar. Dong laeng deng laeng bicara soal samua-samua yang dong parna lia deng dengar waktu dong ada sama-sama deng Antua. Waktu itu, dong seng tau kalo dong pung hidop nanti seng sama lai deng yang dolo.

Konci Rekeng

Carita Yesus Hidop Kombali ni ada dalang Alkitab Janji Baru, di ampa kitab Injil. Ampa kitab tu: **Matius** pasal 28, **Markus** pasal 16, **Lukas** pasal 24, deng **Yohanis** pasal 20. La kalo carita soal Yesus nai ka sorga, akang ada di kitab **Yesus pung Utusang-Utusang pung Carita** (Kisah Para Rasul) pasal 1.

Waktu Yesus mati, Antua pung murid-murid rasa hati ancor. Dong harap kata Antua nanti datang la jadi Raja par parenta dunya ni. Mar Antua su mati. Samua seng ada pung arti apapa lai. Antua pung murid satu yang nama Yudas jual Antua. Petrus jua manyangkal kalo dia kanal Antua.

Mar, pas hari Minggu pagi, waktu parampuang-parampuang pi ka goa tanpa Yesus dapa kubur, dong lia batu basar yang tutu mulu goa su taguling dari sana, la Yesus pung mayat su seng ada lai. Akang pung amper malang, dong samua dapa tau kalo Yesus su hidop kombali. Dong samua su lia Antua. Samua yang Antua su parna bilang deng samua yang Antua su parna janji, akang batul. Antua su hidop kombali. Antua su tabus samua orang pung dosa. Ini ni Kabar Bae. Kabar Bae ni macang deng jalang yang katong musti pili biar katong pung hidop jadi baru, seng sama deng yang dolo lai. Ini ni barita yang katong musti kasi tau par samua orang di sagala tanpa di antero dunya.